

四庫全書

經部

欽定四庫全書

經部

周禮纂訓卷十四

詳校官監察御史臣施朝幹

刑部郎中臣許兆椿覆勘

總校官編修臣王燕緒

校對官待詔臣胡士震

謄錄監生臣黃嶸

欽定四庫全書

周禮纂訓卷十四

安溪李鍾倫撰

大史掌建邦之六典以逆邦國之治掌法以逆官府之治掌則以逆都鄙之治

注大史日官也春秋傳曰天子有日官諸侯有日御日官居卿以底日居猶處也言建六典以處六卿之職訓大史直掌典籍無與勾攷之政然云逆其治者

蓋典法則之籍既在大史則邦國都鄙之治狀文書亦兼藏之以待辨法而考焉耳所謂居卿者以此凡辨法者攷焉不信者刑之

注謂邦國官府都鄙以法爭訟來正之者訓愚謂法典法則之屬大史所藏者也辨法若子產爭賦貢宋仲幾辨役事之類故士伯數仲幾以故府之法而執之所謂不信者刑之蓋亦如此

凡邦國都鄙及萬民之有約劑者藏焉以貳六官六官

之所登

注約劑要盟之載辭及券書也貳副也藏法與約劑之書以為六官之副其有後事六官又登焉訓愚謂六官之所登謂六官登此副本於大史也明非邦國萬民自登之也

若約劑亂則辟法不信者刑之

辟婢亦反
劉芳益反

注謂抵冒盟誓者辟法者考按其然不

正歲年以序事頒之于官府及都鄙

注中數曰歲朔數曰年中朔大小不齊正之以閏以
次序授民時之事

疏云中數曰歲朔數曰年者一年二十四氣正月
立春節雨水中二月啓蟄節春分中三月清明節
穀雨中皆節氣在前中氣在後節氣一名朔氣朔
氣在晦則後月閏中氣在朔則前月閏節氣有入
前月法中氣無入前月法中氣而則為歲朔氣而
則為年假令十二月中氣在晦則閏十二月十六

日得後正月立春節此即朔數曰年至後年正月

一日得啟蟄中

疑當作雨水

此中氣卽是中數曰歲

云中朔大小不齊正之以閏者周天三百六十五度四分度之一日一日行一度二十四氣通閏分之一氣得十五日二十四氣分得三百六十度仍有五度四分度之一一度更分為三十二五度為百六十四分度之一者又分為八分通前為百六十八分二十四氣分之氣得七分若然二十四氣

氣有十五日七分五氣得三十五分取三十二分
為一日餘三分推入後氣即有十六日氣者十五
日七分者是中朔大小不齊正之以閏者月有大
小一年三百五十四而已日餘仍有十一日是以
三十三月以後中氣在晦不置閏則中氣入後月
故置閏以補之也

頒告朔于邦國

注天子頒朔于諸侯諸侯藏之祖廟至朔朝于廟告

而受行之

疏天子頒朔于諸侯諸侯縣之于中門而日斂之
藏之於大祖廟每月朔則皮弁入廟視之也

閏月詔王居門終月

注門謂路寢門月令十二月分在青陽明堂總章玄
堂左右之位閏月無所居居於門故於文王在門謂
之閏

疏明堂路寢及宗廟皆有五室十二堂四門十二

月聽朔于十二堂閏月各於時之門云路寢門者
若在明堂告事之時立行祭禮無居坐之處若在
路寢堂與門聽事之時各居一月故云居門終月
大祭祀與執事卜日

注執事大卜之屬與之者當視墨

疏大卜之屬者大卜掌卜事其屬則兼有卜師卜
人云當視墨者按占人云史占墨

戒及宿之日與羣執事讀禮書而協事

注協合也合謂習錄所當共之事

疏戒謂散齋七日宿謂致齋三日

祭之日執書以次位常

注謂校呼之教其所當居之處

辦事者攷焉不信者誅之

注謂抵冒其職事訓此即上文讀禮書所協之事

大會同朝覲以書協禮事

注亦先習錄之也

及將幣之日執書以詔王

注將送也詔王告王以禮事

大師抱天時與大師同車

大音泰

注史官主知天道春秋傳楚有雲如衆赤鳥夾日以
飛楚子使問諸周太史太史主天道故國語曰吾非
瞽史焉知天道瞽即大師大師瞽官之長

大遷國抱法以前

注法司空營國之法也抱之以前當先王至知諸位

處訓愚謂營國之法不應太史所掌此法蓋國家舊章藏於太史若典法則之屬抱之前王重故典也

大喪執法以泣勸防遣之日讀誄

遺棄戰反

注遣謂祖廟之庭大奠將行時也人之道終於此累其行而讀之大師又帥瞽獻之而作謚瞽史知天道使其共其事言王之誄謚成于天道

疏案曾子問惟天子稱天以誄之注引公羊傳制謚於南郊若然是先於南郊制謚乃於遣之日讀

之

凡喪事攷焉小喪賜謚

注小喪卿大夫也

疏卿大夫將作謚之時其子請於君大史賜之謚
不讀小史為讀之其諸侯之法亦謚於尊案曲禮
言謚曰類以其象聘問之禮見天子乃使大史賜
之謚小史不讀之以諸侯自有史若然此小喪賜
謚三公諸侯亦在焉

凡射事飾中舍算執其禮事

舍音釋

注舍讀曰釋設算於中以待射時而取之中則釋之鄉射禮曰君國中射則皮豎中於郊則間中於竟則虎中大夫兕中士鹿中天子之中未聞

疏言凡射事則大射賓射燕射皆然飾中者治使潔靜舍算者射有三番第一番三耦射不釋算第二第三番乃釋算執其禮事者天子諸侯射先行燕禮太史主禮其中禮事皆掌之注云設算於中

以待射時取之中則釋之者按鄉射大射奠皆於
中西設八筭於中內偶升將射大史取中之八筭
執之待射中則更設於中第二耦第三耦已下皆
然君國中射者謂燕禮在寢於郊謂大學之射於
境謂與隣國君射

小史掌邦國之志奠繫世辨昭穆若有事則詔王之忌
諱

注志記也春秋傳所謂周志國語所謂鄭書之屬史

官主書故韓宣子聘於魯觀書于大史氏繫世謂帝
繫世本之屬是也小史主定之瞽矇諷誦之有事謂
祈祭於其廟先王死日為忌名為諱

大祭祀讀禮法史以書敘昭穆之俎簋

注讀禮法者太史與羣執事史此小史也言讀禮法者
小史敘俎簋以為節小史主敘昭穆以其主定繫世
疏此言敘昭穆則非外神惟據三年一祫時有尸
主兼敘昭穆俎簋也訓疏云讀禮法與小史敘俎

簋以為節者謂小史敘昭穆及俎簋之時當依太史所讀禮法之節

大喪大賓客大會同大軍旅佐大史凡國事之用禮法者掌其小事卿大夫之喪賜諡讀誄

馮相氏掌十有二歲十有二月十有二辰十日二十有

八星之位辨其序事以會天位

馮音憑相
息亮反

注歲謂太歲歲星與日同次之月斗所建之辰樂說說歲星與日常應太歲以見然則今歷太歲非此也

歲日月辰星宿之位謂方面所在辨其序事謂若仲
春辨秩東作仲夏辨秩南訖仲秋辨秩西成仲冬辨
在朔易會天位者合此歲日月辰星宿五者以為時
事之候孝經說曰勅以天期四時節有早晚趣勉趣
時無失天位訓此注所云太歲其說非經又云與日
同次之月斗所建之辰更非其理歲星之不能與日
纏月建相應也明矣或曰十二歲謂歲星一年而移
一次者也十二月謂斗建一月而移一次者也十二

辰謂一日合晝夜而歷十二次者也此五者皆可以為歲月日辰之紀故辨之以為時事之候而參合于在天之位焉

冬夏致日春秋致月以辨四時之敘

注冬至日在牽牛景丈三尺夏至日在東井景尺五寸此長短之極極則氣至春分日在婁秋分日在角而月弦于牽牛東井亦以其景知氣至不春夏秋冬夏氣皆至則四時之敘正矣

疏春分月上弦在東井圓於角下弦於牽牛秋分月上弦於牽牛圓於婁下弦於東井鄭不言圓望但言日在婁日在角義可知也訓案月無測景之法其云春秋致月者蓋以仲春中秋之月月食之時撿取日躔所在因以知其交赤道之度其或未及交而食則春秋分在望後其或過交而食則春秋分在望前其或月食正當交處則春秋分即在望以此進退求之而二分可得若夫二至則求日

景之法不可易矣馮相氏所掌主於辨寒暑定節氣所謂敬授人時者也保章氏所掌主於占驗祥祥所謂休徵咎徵者也

保章氏掌天星以志星辰日月之變動以觀天下之遷
辨其吉凶

注星謂五星辰日月所會五星有贏縮間角日有薄
食暈珥月有盈虧朏側匿之變七者右行列舍天下
禍福變移所在皆見焉訓愚謂此節統天之全體言

此星不止五星蓋彗孛及流星之屬在是

以星土辨九州之地所封封域皆有分星以觀妖祥

注星土星所主土也大界則曰九州州中諸國中之
封域於星亦有分焉其書亡矣堪輿雖有郡國所入
度非古數也今其存可言者十二次之分也星紀吳
越也玄枵齊也娵訾衛也降婁魯也大梁趙也實沈
晉也鶉首秦也鶉火周也鶉尾楚也壽星鄭也大火
宋也析木燕也此分野之妖祥主用客星彗孛之氣

為象訓愚謂此節主二十八宿言

以十有二歲之相觀天下之妖祥

相息
亮反

注歲謂太歲歲星與日同次之月斗所建之辰也歲星為陽右行於天太歲為陰左行於地十二歲而小周其妖祥之占甘氏歲星經其遺象也春秋傳曰越得歲而吳伐之必受其凶訓愚謂此以五星言古者占吉凶惟主木火二星木星所在其國有福火星所在其國有禍十二歲之相謂木與火益木旺火相也

以分星為經以五星為緯分星各主其野之妖祥五星則通主天下之妖祥也然則馮相氏亦主十二歲者彼蓋主辨正四時歲星行度歲厯一辰有奇是亦一歲寒暑有相考證之候保章氏則專察其妖祥之應義各不同也

以五雲之物辨吉凶水旱降豐荒之祲象

注物色也視日旁雲氣之色降下也知水旱所下之國鄭司農云以二至二分觀雲色青為蟲白為喪赤

為兵荒黑為水黃為豐故春秋傳曰分至啟閉必書雲物為備故也故曰凡此五物以詔救政訓五雲蓋泛浮雲物若視禋所謂十輝則日旁氣是也

以十有二風察天地之和命乖別之妖祥

注十有二辰皆有風吹其律以知和不其道亡矣春秋傳楚師伐鄭師曠曰吾驟歌北風又歌南風南風不競多死聲楚必無功訓愚謂吹律而知者樂官之事此蓋十二月之風而已溫涼寒燠以時之謂和

則祥乖別則妖

凡此五物者以詔救政訪序事

注訪謀也見其象則當預為之備訓訪序事訪其得失也

內史掌王之八枋之法以詔王治一曰爵二曰祿三曰

廢四曰置五曰殺六曰生七曰予八曰奪

枋本又作柄兵病反治直吏反下同

訓八者以相對為文廢置以爵言予奪以祿言執國法及國令之貳以攷政事以逆會計

注國法六典八法八則訓此內史之官蓋出納王命者凡爵祿廢置殺生予奪皆有一定之制所謂國法書曰官不及私昵惟其賢爵罔及惡德惟其能是也以其先王所立謂之法以其今王所出謂之令貳太史也太史貳六官內史貳太史此國法國令其書太史蓋亦藏之凡八枋之出內皆於會計之時攷治狀而行之故曰以攷政事以逆會計

掌敘事之法受納訪以詔王聽治

注敘六敘也納訪納謀於王也六敘六曰以敘聽其情訓此蓋謂王視朝時百官各執其事次序而行之各有其法如宰夫所謂敘羣吏之治亦其類也內外朝各有官掌其敘事其法則在內史敘之者宰夫司士朝士是也內史蓋惟出納王命而兼掌敘事之法者以其職受納訪也故宰夫職亦曰以待諸臣之復萬民之逆納者臣民所進而君納之訪者朝廷所訪而臣民對之也

凡命諸侯及孤卿大夫則策命之

注策謂以簡策書王命

疏周法士亦有命不言者畧之也

凡四方之事書內史讀之

疏四方諸侯凡事有書奏白於王

王制祿則贊為之以方出之賞賜亦如之

注贊為之為之辭也以方出之以方版書而出之上

農夫食九人其次食八人其次食七人其次食六人

下農夫食五人庶人在官者其祿以是為差諸侯之下士視上農夫中士倍下士上士倍中士下大夫倍上士卿四大夫祿君十卿祿王之三公視公侯卿視伯大夫視子男元士視附庸

疏下士視上農夫若然則府食八人史食七人胥食六人徒食五人故云庶人在官者其祿以是為差訓爵祿二者特詳言之蓋其重也制祿直至府史胥徒故文又次于四方書事之後與

內史掌書王命遂貳之

注副寫藏之

外史掌書外令

注王令下畿外

掌四方之志

注志記也謂若魯之春秋晉之乘楚之檮杌訓四方之志所謂九丘者也

掌三皇五帝之書

注所謂三墳五典

掌達書名于四方

注古曰名今曰字使四方知書之文字得能讀之訓
達之者使書同文也

若以書使于四方則書其令

注書王令以授使者

御史掌邦國都鄙及萬民之治令以贊冢宰

注王所以治之令冢宰掌王治訓治令謂尋常出治

之令治自家宰出御史掌為其令以佐之內史所掌
王令謂八柄中之令外史所掌王命謂聘問列邦之
令與此異也

凡治者受法令焉

注為書寫其治之法令來受則授之

疏凡治者謂外內官所有治職者

掌贊書

注王有命當以書致之則贊為辭

凡數從政者

注自公卿以下至胥徒凡數及其見在空缺者訓贊書謂贊內史外史凡數從政謂為從政凡數以備校次也

巾車掌公車之政令辨其用與其旗物而等敎之以治其出入

注公猶官也用謂祀賓之屬旗物太常以下等敎之以封同姓異姓之次序

疏出入謂若下文凡車之出入則會之訓愚謂辨其用則封同姓異姓亦辨之矣等敘者蓋分何者為王乘車何者為五等諸侯之車何者為賞賜之車尊卑有等也

王之五路一曰玉路錫樊纓十有再就建大常十有二旂以祀

錫音陽樊步干反下同旂音留

注王在焉曰路玉路以玉飾諸末錫馬面當盧刻金為之所謂鏤錫樊讀如鞶帶之鞶謂今馬大帶也纓

謂今馬鞅玉路之樊及纓皆以五采屬飾之十二就
就成大常九旗之畫日月者正幅為緣存則屬馬
疏但言以祀則外內大小祀皆用玉路矣云王在
馬曰路者路大也謂若路寢路馬皆稱路云以玉
飾諸末者凡車上之材於末頭皆飾之云錫馬面
當盧者眉上曰錫故知當額盧刻金為之者以金
為飾云纓是馬鞅者以鞮為馬大帶明纓是夾馬
頸故以鞅解之也云五采屬飾之者爾雅注郭氏

云毛氂所以為屬是屬染毛為之王者就飾皆用
五采惟有外傳小采以朝月者用三采耳訓按旗
有緣旂緣者以正幅直屬於竿又以十二幅橫屬
於緣是為旂大常十二旂大旗九旂熊旗六旂鳥
旂七旂龜蛇四旂餘四旗則無旂也

金路鉤樊纓九就建大旂以賓同姓以封

注金路以金飾諸末鉤婁領之鉤也金路無錫有鉤
亦以金為之大旂九旂之畫交龍者以賓以會賓客

同姓以封謂王子母弟率以功德出封雖為侯伯其
畫服如上公若魯衛之屬其無功德各以親疏食采
畿內而已

疏云金路無錫有鈎則玉路錫鈎兼有可知云以
賓以會賓客至於載主亦同焉故曾子問天子巡
守以遷廟主行載于齊車注云齊車金路若王弔
亦乘金路是以士喪禮注云君弔蓋乘象謂得金
路之賜者弔時降一等乘象則王有玉路弔時當

降乘金路也云王子母弟雖為侯伯畫服如上公者周法二王後稱公同姓例稱侯伯若魯衛鄭也知畫服如上公者按明堂位魯侯服冕是也云無功德者食采畿內者按禮運云天子有田以處其子孫是也訓按詩云鉤膺鏤錫蓋當馬膺前以金鉤為飾又加錫馬者是玉路之飾此王所賜韓侯也

象路朱樊纓七就建大赤以朝異姓以封

注象路無鉤以朱飾勒而已大赤九旂之通帛

疏鄭知以朱飾勒者見下云龍勒知此朱同是飾
勒也按司常云道車載旒注云道車象路也王以
朝夕燕出入則建旒若視朝則大赤也訓案所云
同姓以封異姓以封者專指車言不謂旗物也若
旗物則五等諸侯竝建旗但其旂則隨尊卑為多
少耳故大行人云上公九旂侯伯七旂子男五旂
司常云諸侯建旗是也言諸侯則五等皆兼之矣

蓋謂之旂者以交龍為旂非以旂數而得名也

革路龍勒條纓五就建大白以即戎以封四衛

條註作
條他刀

反

注革路鞞之以革而漆之無他飾龍駟也以白黑飾
韋雜色為勒條讀為條其樊及纓以條絲飾之不言
樊字蓋脫耳大白殷之旗四衛四方諸侯守衛服者
蠻服以內

疏云革路鞞之以革而漆者王金象路皆有革鞞

但更有玉金等為飾此革路則無之也趙商問巾
車職云建大白以即戎大司馬職秋辨旗物以治
兵王載大常下注云凡班旗物以出軍則如秋不
知大白用在何時答云大白或會事或勞師不親
將故建先王之正色異於親自將也

木路前樊鵠纓建大麾以田以封蕃國

前註作翦子踐
反鵠戶篤反

注木路不輓以革漆之而已前讀為緇翦之翦淺黑
也木路無龍勒以淺黑飾韋為樊鵠色飾韋為纓不

言就數飾與革路同大麾不在九旗中以正色言之則黑夏后氏所建蕃國九州之外夷服鎮服蕃服杜子春云鵠或為結

疏云大麾不在九旗中者九旗中雖無大白仍有雜帛為物故此特言之趙商問巾車建大麾以田司馬職四時皆建大常何答云春夏尚生夏后不以兵得天下故建其正色以春田秋冬乃建大常也凡五等諸侯所得路朝天子時乘至天子館則

舍之于館故覲禮記云偏駕不入王門乘墨車龍
旂以朝也同姓侯伯如上公得乘金路若子男當
與異姓同象路異姓上公金路其侯伯子男同象
路四衛革路者亦謂異姓侯伯子男蕃國木路者
夷狄惟有子男同木路也

王后之五路重翟錫面朱總厭翟勒面續總安車彤面

鷩總皆有容蓋

重直龍反總作動反厭於涉反
續戶對反鷩鳥兮反劉鳥計反

注重翟重翟雉之羽也錫馬面錫總以繒為之著馬

勒直兩耳與兩鑣車衡轡亦宜有馬厭翟次其羽使
相迫也勒面謂以如王龍勒之韋為當面飾也安車
坐乘車凡婦人車皆坐乘彫者畫之不龍其韋驚讀
為鳧驚之驚驚總青黑色容為檐車山東謂之裳幃
蓋如今小車蓋也皆有容有益則重翟厭翟謂蔽也
重翟后從王祭祀所乘厭翟后從王賓饗諸侯所乘
安車無蔽后朝見於王所乘謂去飾也詩曰翟茀以
朝謂諸侯夫人始來乘翟茀之車以朝見於君盛之

也此翟第蓋厭翟也然則王后始來乘重翟乎

疏凡言翟者皆謂以翟鳥羽為兩旁之蔽言重翟者皆二重厭翟謂相次以厭其本下文翟車又不厭其本也凡言總者謂以總為車馬之飾若婦人之總亦既繫其本又垂為飾也按下翟車尊於安車而進之在上者以其翟車有幄無蓋安車同有容蓋故進之同在上也若然王后五路皆是坐乘獨此得安車之名者以餘有重翟厭翟翟車輦車

之名可稱此無異稱故獨得安車之名也云重翟
乘以祭祀者后無外事惟祭先王先公羣小祀皆
乘此重翟也訓纂注疏以總為車馬之飾在馬則
施於勒直兩耳與兩鑣鑣馬銜鐵也在車則施於
衡轡衡即軛車前橫木以駕馬領者轡轡端鐵轡
居輪中其端謂之轡然以人總角之總義推之總
惟當施馬蓋與馬鬣為飾也於車義蓋無取耳
所謂容者蓋以繒結車四旁之上際其四旁下際

則以翟為蔽又施蓋以禦雨暘此惟婦車有之若
男子尊者之車有益無容喪車則有容也

翟車貝面組總有握

注翟車不重不厭以翟飾車之側耳貝面貝飾勒之
當面也有握則此無蓋矣后所乘以出桑

疏上言總是以繒為之此言組總則以組條為之

輦車組輓有翼羽蓋

組音祖輓音
晚翼所甲反

注輦車不言飾后居宮中從容所乘但漆之而已為

輶輪人輓之以行有翼所以禦風塵以羽作小蓋為翳日也

疏知為輶輪者按禮記云載以輶車輶車載柩之車則地官蜃車人輓之以行此組輓亦是人輓行者按許氏說文有輻曰輪無輻曰輶則輶輪是無輻者也又按雜記注輶崇蓋半乘車之輪乘車高六尺六寸則此當三尺三寸矣

王之喪車五乘木車蒲蔽犬禭尾囊䟽飾小服皆䟽

乘繩

證反下五乘同禭莫歷
反索音羔劉姑道反

注木車不漆者蔽車旁禦風塵者大禭以白犬皮為
覆苓又以其尾為戈戟之弣疏布飾二物之側為之
緣服讀為簾小簾刀劍短兵之衣此始遭喪所乘為
君之道尚微備姦臣也書曰以虎賁百人逆子釗亦
為備焉

疏喪車無飾至禪乃漆之木車及下素車等皆然
覆苓者古者男子立乘須馮軾軾上須皮覆之故

云犬禭云以其尾為戈戟之殳者此釋尾橐以經
連犬禭明同用犬此喪車五乘貴賤皆同乘之是
以雜記曰端衰喪車皆無等云為君尚微備奸臣
者為尾橐戈戟而言按既夕是士喪禮有犬服則
此小服亦其常惟戈戟人君乃有之引書者王崩
世子當在尸所欲別於庶子故使出卿門外後以
太子禮迎之

答力丁反殳吐
刀反釗音昭

素車琴蔽犬禭素飾小服皆素

琴扶
云反

注素車以白土堊車也。𦵏讀為頰。頰麻以為蔽其襪。
服以素繒為緣。此卒哭所乘為君之道。益著在車可

以去戈戟

堊烏路反
頰扶文反

藻車藻蔽鹿淺襪革飾

藻藻本字
全音早

注藻水草蒼色以蒼土堊車以蒼繒為蔽也。鹿淺襪
以鹿夏皮為覆。筓又以所治去毛者緣之。此既練所
乘。

疏云鹿夏皮者夏時鹿毛新生為淺毛云所治去

毛者皮去毛曰革也

駟車藿蔽然襖髹飾

駟音麗藿音九髹音休許尤切亦作髹

注駟車邊側有漆飾也藿細輦席漆則成藩即吉也

然果然猿屬髹赤多黑少之色韋也此大祥所乘

疏云漆則成藩即吉者下文藩蔽因此而漆之則

藩者以此為本

漆車藩蔽駟襖雀飾

駟音五以反

注漆車黑車也藩漆席以為之駟胡犬雀黑多赤少

之色韋也此禪所乘

服車五乘孤乘夏篆卿乘夏縵大夫乘墨車士乘棧車

庶人乘役車

篆音直轉反縵莫干反棧音孃士限切

注服車服事者之車篆讀為圭瑑之瑑轂有約也夏篆五采畫轂約也夏縵亦五采畫無瑑爾墨車不畫也棧車不革輓而漆之役車方箱可載任器以共役疏不見婦人車者婦人與夫同但士親迎則有攝盛故士昏禮主人乘墨車婦車亦如之大夫以上

則不假攝盛也言綬者亦如綬帛無文章故云無
環以其家為轂約則言綬者無約也云從車方箱
者按冬官乘車田車橫廣前後短大車柏車羊車
皆方故知從車亦方從車亦名棧車故詩云有棧
之車注云從車是也訓此注家為轂約按采芑詩
約帟錯衡疏云帟轂也約者以皮纏之而於其上
施畫采也

凡良車散車不在等者其用無常

注給遊燕及恩惠之賜不在等者作之有功有沽

疏云有功有沽釋良車散車

凡車之出入歲終則會之

注計其完敗多少

疏車之出謂出給官用入謂用罷歸官

凡賜闕之

注完敗不計

疏以其賜人以後完敗隨彼也

金匱要略卷十四
毀折入齋于職幣

齋音洛

注計所傷敗入其直謂乘官車毀折者入財以償繕治之直

疏此之財物入于職幣職幣既得此物還與冬官繕治之

大喪節遣車遂厥之行

注厥謂陳駕之行謂使人以次舉之以如墓也遣車

一曰鸞車

疏云廡謂陳駕者按廡是作之此文飾遣車已是作故以陳駕解廡也又名鸞車者以遣車亦有鸞鈴也按檀弓曰諸侯太牢苞七个遣車七乘大夫亦太牢苞五个遣車五乘則天子當太牢苞九个遣車九乘也

及葬執蓋從車持旌

注從車隨柩路持蓋與旌者王生時車建旌雨則有蓋今蜃車無蓋執而隨之象生時有也所執者銘旌

疏執蓋在柩車後持銘旌在柩車前以同是巾車故因言之云蜃車無蓋者以設帷荒故也云所執者銘旌者將葬之旌有銘旌又有厥車之旌也

及墓嘯啓闕陳車

注闕墓門也車貳車也士喪禮曰車至道左北面立
東上

疏知車是貳車者此不言明器而別陳車是貳車可知天子貳車當十二乘引士喪禮者彼士無貳

車惟據乘車道車橐車三乘若然此王禮亦有此
三乘但者貳車者舉士喪禮不見者而言

小喪共匱路與其飾

疏上大喪據王此小喪兼有后世子柩路即蜃車
飾即帷荒柳筵之屬

歲時更續共其弊車

注更易其舊續續其不任用共其弊車巾車既更續
之取其弊車共於車人材或有巾用之

大祭祀鳴鈴以應雞人

注必使鳴鈴者車有和鸞相應和之象

典路掌王及后之五路辨其名物與其用說

說書
銳反

注用謂將有朝祀之事而駕之說謂舍車訓五路巾
車既掌之典路蓋掌其駕說之事畢則復藏於巾車
也

若有大祭祀則出路贊駕說

注出路王當乘之贊駕說贊僕與趣馬也

疏案玉路以祀則此惟出玉路也

大喪大賓客亦如之

注亦出路當陳之顧命曰大路在賓階面贅路在阼階面先路在左塾之前次路在右塾之前

疏云亦出路當陳之者謂以華國亦有常乘者但賓客王乘金路其大喪則無乘吉時路惟陳之大路玉路也贅路玉路之貳先路象路也次路象路之貳

凡會同軍旅弔于四方以路從

注王出於事無常王乘一路典路以其餘路從行亦

以華國

疏餘路皆從惟玉路祭祀之車不出

車僕掌戎路之萃廣車之萃闕車之萃革車之萃輕車

之萃

萃七內反下从注同
革薄輶反又蒲田反

注萃猶副也此五者皆兵車戎路王在軍所乘也廣

車橫陳之車也闕車所用補闕之車也革猶屏也所

用對敵自蔽隱之車也輕車所用馳敵致師之車也
春秋傳曰公喪戎路又曰其君之戎分為二廣又曰
帥旂闕四十乘孫子八陳有革車之陳又曰馳車千
乘五者之制及萃數未盡聞也書曰武王戎車三百
兩

疏此戎路則巾車革路巾車雖掌正戎之一其下
四戎之正亦巾車掌之矣言五者之制及萃數未
盡聞則亦有聞者謂四十乘及千乘三百兩等是

也訓案射人職云大師令有爵者乘王之萃車疏云王出征伐副車十二乘皆從王行是此所云萃謂十二乘者也注引春秋傳及孫子之屬謂五戎所屬總有此數耳非以萃有四十乘三百兩也然則云萃數未盡聞者以十二乘之文不著於經疏蓋以士喪禮有三乘因差次而言耳此五戎之僕右當亦戎僕戎右兼攝之與又按顧命有大路綴路先路次路注云大路玉路也先路象路也綴路大路

之貳次路先路之貳馭夫職又有貳車從車則巾車五路亦皆有副但其數皆不可攷或俱十二乘與

凡師共革車各以其萃

注五戎者共其一以為王優尊者所乘也而萃各從其元馬

疏不云革路總云革車則所含者多五戎皆是王惟乘一路而四路皆從是優尊也

會同亦如之

注巡守及兵車之會則王乘戎路乘車之會王雖乘金路猶共以從不失備也

疏知巡守及兵車之會乘戎路者見戎僕云掌馭戎車巡守及兵車之會亦如之

大喪獻革車

注言興革車則遣車不徒戎路廣闕革輕皆有焉

疏天子遣車九乘除此五乘外加玉金象木則九

乘矣

大射共三乏

疏乏一名容以革車用皮乏亦用皮故使共之云
大射共乏至於燕射賓射亦共乏矣

司常掌九旗之物名各有屬以待國事日月為常交龍
為旂通帛為旌雜帛為物熊虎為旗鳥隼為旟龜蛇為

旐金羽為旞析羽為旛

旌之然反隼鳥反旟
音餘旐音兆旛音遂

注屬謂徽識也大傳謂之徽號通帛謂大赤從周正

色無飾雜帛以帛素飾其側白殷之正色全羽析羽
皆五采繫之於旒旌之上所謂注旒於干荷也凡九
旗之帛皆用絳

疏云徽識者謂在軍在朝所用小旌云注羽干荷
者是爾雅文引之者明旒旌非直有羽亦有旒此
雖據旒旌言至於太常以下首皆有旒羽故夏采
云乘車建綏復于四郊注綏以旒牛尾為之綴於
幢上王祀四郊乘玉路建太常今以之復去其旒

異之於生是也按全羽析羽直有羽而無帛云九
旗之帛者據衆有而言

及國之大閱贊司馬頌旗物王建大常諸侯建旂孤卿
建旌大夫士建物師都建旗州里建旗縣鄙建旐道車
載旒旒車載旌

注自王以下治民者旗畫成物之象王畫日月象天
明也諸侯畫交龍一象其升朝一象其下復也師都
鄉遂大夫也鄉民所聚也畫熊虎者鄉遂出軍賦象

其守猛也州里縣鄙鄉遂之官互約言之鳥隼象其
勇健也龜蛇象其扞難避害也道車象路也王以朝
夕燕出入游車木路也王以田以鄙金羽析羽五色
象其文德也大閱王乘戎路建太常馬玉路金路不
出

疏此九旗雖總為大閱而言其實道車游車非為
軍事也按左傳云三辰旂旗則此大常日月星俱
畫是三辰也云旂畫升降龍者以其衣服不言交

龍直云袞龍則是有升龍無降龍天子之衣既無
日月星辰則龍應有升降諸侯不得與天子同也
鄉大夫皆卿遂大夫皆大夫所建異今以其為軍
將故同建旗云州里縣鄙鄉遂之官互約言之者
遂之里得與鄉之州同建旗則鄉之閭亦得與遂
之縣同建旒遂之鄙得與縣同建旒鄉之黨亦得
與州同建旗是互也約者鄉之族與黨同建旗比
與閭同見旒也遂之鄩從鄙同建旒鄰得從里同

建旗是約也但族鄙已下皆士雖與已上大夫同建其仞數則短當三仞以下也訓愚謂巾車大麾王制天子殺則下大綏及此太常皆一物常者旂之總名以其去綏旂止存竿首旄羽則曰綏夏采所謂綏是也夏采復于四郊用綏郊乃王平時田獵之所綏亦王平時田獵所用以其去綏旂止有旄羽可用以麾則曰大麾牧誓所謂白旄以麾蓋是與然牧誓是兵事合建大白而用此者則鄭氏

所謂命將勞師與親將異親將所建當與田時同
牧野是武王親將綏麾亦可通曰常以其常之去
存者也故此與司馬俱稱常實是大麾也又按太
常以下皆以人所當建而言道車旂車不應指象
路木路也且田僕馭木路以田戎僕馭戎路以巡
守及兵車之會各有所主雖御象路者曰道僕然
恐不可以一字牽合為說愚意二者皆是使節故
曰旌節旒旌一類言旌則可通於旒矣且士喪禮有道

車若象路不可云車傳命於境內謂之道車道國中
之路也出境有事於四方謂之旂車若旂說云
皆畫其象焉官府各象其事州里各象其名家各象其
號

注事名號者徽識所以題別衆樹之於位朝各就焉
覲禮曰公侯伯子男皆就其旂而立此其類也或謂
之事或謂之名或謂之號異外內也三者旌旗之細
也士喪禮曰為銘各以其物亡則以緇長半幅頽末

長終幅廣三寸書名于末此蓋其制也徽識之書則云某某之事某某之名某某之號兵凶事若有死事者亦當以相別也杜子春云畫當為書玄謂畫畫雲氣也異於在國軍事之飾

疏云所以題別衆臣者此經雖為軍事而言其在朝位亦然故引覲禮為證也云三者皆旌旗之細者對上太常是旌旗之大也云軍事尚飾者覲禮及銘旌皆不云畫以其在國質惟其軍畫之也訓

愚謂此承上文宜皆畫於旌旗之上而注以為別
有小旌畫之似非也若出軍之時大旗上即書大
將某人今猶有之設若州里則書某州長某人家
則書某采邑卿大夫某家如此而已且士喪禮為
無旗言之也若有旗則書旗矣杜子春破畫為書
者是也若皆畫雲氣即不得云皆畫其象矣

凡祭祀各建其旗

注王祭祀之車則玉路

疏云各建其旗則諸侯已下所得路各有旗

會同賓客亦如之置旌門

注賓客朝覲宗過王乘金路巡守兵車之會王乘戎路皆建太常掌舍職云為帷宮設旌門

疏知朝覲宗過乘金路者見齊僕云掌馭金路以賓又知巡守兵車之會乘戎路者以其皆軍事引掌舍職者彼注謂王行畫止則樹旌為門彼官樹之此官共旌

大喪共銘旌

注王則太常士喪禮曰為銘各以其物

建廠車之旌及葬亦如之

注葬云建之則行廠車解說之

疏建謂在廟陳時以廠旌建於遣車之上在道則
去之使人各執遣車及廠旌及入壙又建之訓按
旌有三等一為銘旌用生時旌則小祝疏中所謂
以尺易仞及生時無旌則以緇繒書賴末者是也

一是乘車所載之旌亦用生時旌其長短不見於經或當依生時仍數既夕禮云乘車載旌道車載服橐車載蓑笠是也既夕士禮而載旌者疏家以爲士無旗攝盛也銘旌則在柩前與柩同入壙乘車亦在柩前柩既入壙乃斂乘車之旌載於柩車以歸所謂送形而往迎精而反也此二等之旌皆見既夕此外又有廠車之旌則明器也天子遣車九乘應各有旌其長短及旗名俱未詳此廠車及

旌從明器俱納壙中即此經所云今按銘旌則既夕此經皆有但既夕有乘車之旌而無廡旌此經有廡旌而無乘車之旌孔氏謂天子當亦有金路載太常至壙斂之以歸但經文或不具耳其廡車之旌惟大夫以上有遣車乃有之既夕士禮故無遣車則無廡旌也

凡軍事建旌旗及致民置旗弊之

注始置旗以致民民至仆之誅後至者訓建旌旗若

置門之屬皆是此句總

句亦如之凡射共獲旌

疏謂服不氏唱獲所持之旌

歲時共更旌

注取舊予新

疏謂受官旌旗用之者

都宗人掌都祭祀之禮凡都祭祀致福于國

注都或有山川及因國無主九皇六十四民之祀王

子弟則立其祖王之廟其祭祀王皆賜禽焉主其禮者警戒之糾其戒具其來致福則帥而以造祭僕

疏九皇六十四民竝是上古無名號之君云王子弟則立其祖王之廟者見左傳莊二十八年邑有先君之主曰都云其祭祀王皆賜禽焉者見祭僕云王所不與則賜之禽都家亦如之訓注疏據左傳邑有先君之主曰都謂即此都家之都恐不可同家茂夫叔曰左傳所謂都者如周雖都洛而豐

鎬是起基之地亦設文武廟故成王寧周公以秬鬯二卣而周公禋于文王武王是也又如列國亦有此法如晉雖遷絳而曲沃君之宗也亦是此類周官都家自據采邑大小言意各不同

正都禮與其服若有寇戎之事則保羣神之壇

壇惟
癸反

注守山川丘陵墳衍之壇域訓此亦謂都也若國之神壇則小祝所謂保郊者是

國有大故則令禱祠既祭反命于國

注令令都之有司也祭謂報塞也反命白玉

疏云令有司者此都宗人是王家之官明所令是
都內有司

家宗人掌家祭祀之禮凡祭祀致福

注大夫采地所祀與都同若先王之子孫亦有祖廟
疏卿為小都在四百里公為大都在五百里則上
都宗人所主大夫稱家在三百里則此是也但天
子諸侯禮異諸侯之同姓卿大夫采邑有先君之

主曰都無曰邑天子之同姓大夫雖有先君之主亦曰邑也

國有大故則令禱祠反命祭亦如之掌家禮與其衣服宮室車旗之禁令

注不言寇戎保羣臣之壘則都家自保之都宗人所保者謂王所祀明矣

疏云王所祀謂王所命祀者訓王所命祀都家皆有彼此文有詳畧耳按諸侯不得祖天子大夫不

得祖諸侯公廟之設於私家非禮也此經都家之別不當據左傳所云邑有宗廟先君之主而為說且周禮都家自據家邑小都大都而言與左傳之意不符其云祭祀致福豈必謂是祭於先王如左傳孔張歸脤受脤是私家之祭亦自可致福于國經曰以脤膾親兄弟之國是惟同姓之公侯卿大夫乃有脤也

凡以神仕者掌三辰之法以猶神示之居辨其名物

注猶圖也居謂坐也天者羣神之精日月星辰其著位也以此圖天神人鬼地祇之坐者謂布祭衆寡與其居句孝經說郊祀之禮曰燔燎掃地祭牲薦粢或象天酒旗坐星廚倉具黍稷布席極敬心也言郊之布席象五帝坐禮祭宗廟序昭穆亦又有似虛危則祭天園丘象北極祭地方澤象后妃及社稷之席皆有明法焉國語曰古者民之精爽不攜二者而又能齋肅中正其知能上下比義其聖能光遠宣朗其明

能光照之其聽能聽徹之如是則神明降之在男曰
覲在女曰巫是知使制神之處位次主而為之牲醢
時服巫既知神如此又能居以天法是以聖人用之
今之巫祝既闇其義何明之見何法之行正神不降
或於淫厲苟貪貨食遂誣人神令此道滅痛矣

疏虛危有墳墓四司又為宗廟布席象也

以冬至致天神人鬼以夏日至致地示物魁以禴國

之凶荒民之札喪

魁眉
祕反

注天人陽也地物陰也陽氣升而祭鬼神陰氣升而祭地示物魑所以順其為人與物也致人鬼於祖廟致物魑于墀壇蓋用祭天地之明日百物之神曰魑春秋傳曰魑魍魎杜子春云禴除也玄謂此禴讀如潰癰之潰訓王氏應電曰聖人生而神靈故能通幽明之故下此得氣清明者亦推測天地陰陽鬼神之故此卜筮占夢眡祲馮相保章大祝司巫等官所由設也記曰王前巫而後史卜筮瞽侑皆在左右王

中心無為也以守至正是弭災所謂禴凶荒札喪者亦非謂災至而禴之蓋因冬至夏至祀天地之日而附以人鬼物彪因有所攘卻焉耳家茂夫叔曰以神仕者卜史巫祝皆是聚而養之使精其道及有所成然後以其藝而貴賤之愚謂注引國語是專以此為巫覡愚意亦同蓋此條所言不主宗廟皆是外神凡巫覡所掌外神居多祝宗所掌內神居多

周禮纂訓卷十四

欽定四庫全書

周禮纂訓卷十五

安溪李鍾倫撰

夏官司馬第四

惟王建國辨方正位體國經野設官分職以為民極乃
立夏官司馬使帥其屬而掌邦政以佐王平邦國
政官之屬大司馬卿一人小司馬中大夫二人軍司馬
下大夫四人興司馬上士八人行司馬中士十有六

人旅下士三十有二人府六人史十有六人胥三十有二人徒三百有二十八

凡制軍萬有二千五百人為軍王六軍大國三軍次國二軍小國一軍軍將皆命卿二千有五百人為師師帥皆中大夫五百人為旅旅帥皆下大夫百人為卒卒長皆上士二十五人為兩兩司馬皆中士五人為伍伍皆有長一軍則二府六史胥十人徒百人

司勳上士二人下士四人府二人史四人胥二人徒二

十人

馬質中士二人府一人史二人賈四人徒八人

賈音嫁

量人下士二人府一人史四人徒八人

量音亮或音良

小子下士二人史一人徒八人

羊人下士二人史一人賈二人徒八人

司燿下士二人徒六人

燿音貫古玩切

掌固上士二人下士八人府二人史四人胥四人徒四

十人

司險中士二人下士四人史二人徒四十人

掌疆中士八人史四人胥十有六人徒百有六十人

候人上士六人下士十有二人史六人徒百有二十人

環人下士六人史二人徒十有二人

環戶
關反

挈壺氏下士六人史二人徒十有二人

挈苦結反
一音結

射人下大夫二人上士四人下士八人府二人史四人

胥二人徒二十人

服不氏下士一人徒四人

射鳥氏下士一人徒四人

羅氏下士一人徒八人

掌畜下士二人史二人胥二人徒二十人

司士下大夫二人中士六人下士十有二人府二人史

四人胥四人徒四十人

諸子下大夫二人中士四人府二人史二人胥二人徒

二十人

司右上士二人下士四人府四人史四人胥八人徒八

十人

虎賁氏下大夫二人中士十有二人府二人史八人胥八十人虎士八百人

旅賁氏中士二人下士十有六人史二人徒八人

節服氏下士八人徒四人

方相氏狂夫四人

太僕下大夫二人小臣上士四人祭僕中士六人御僕下士十有二人府二人史四人胥二人徒二十人

隸僕下士二人府一人史二人胥四人徒四十人

弁師下士二人工四人史二人徒四人

弁皮
彥反

司甲下大夫二人中士八人府四人史八人胥八人徒八十人

司兵中士四人府二人史四人胥二人徒二十人

司戈盾下士二人府一人史二人徒四人

司弓矢下大夫二人中士八人府四人史八人胥八人

徒八十人

繕人上士二人下士四人府一人史二人胥二人徒二

十人

橐人中士四人府二人史四人胥二人徒二十人

橐古老反

戎右中大夫二人上士二人

齊右下大夫二人

齊側皆反

道右上士二人

大馭中大夫二人

戎僕中大夫二人

齊僕下大夫二人

齊側皆反

道僕上士十有二人

田僕上士十有二人

馭夫中士二十人下士四十人

校人中大夫二人上士四人下士十有六人府四人史

八人胥八人徒八十人

校戶
救反

趣馬下士皐一人徒四人

趣七口反
劉清須反

巫馬下士二人醫四人府一人史二人賈二人徒二十

人

牧師下士四人胥四人徒四十人

廩人下士閭二人史二人徒二十人

廩所求反

圉師乘一人徒二人圉人良馬匹一人駑馬麗一人

職方氏中大夫四人下大夫八人中士十有六人府四

人史十有六人胥十有六人徒百有六十八人

土方氏上士五人下士十人府二人史五人胥五人徒

五十人

懷方氏中士八人府四人史四人胥四人徒四十人

合方氏中士八人府四人史四人胥四人徒四十人
訓方氏中士四人府四人史四人胥四人徒四十人
彤方氏中士四人府四人史四人胥四人徒四十人
山師中士二人下士四人府二人史四人胥四人徒四
十人

川師中士二人下士四人府二人史四人胥四人徒四
十人

邈師中士四人下士八人府四人史八人胥八人徒八

十人

邇昔原

匡人中士四人史四人徒八人

禪人中士四人史四人徒八人

禪他南反與探同

都司馬每都上士二人中士四人下士八人府二人史

八人胥八人徒八十八人

家司馬各使其臣以正於公司馬

大司馬之職掌建邦國之九灋以佐王平邦國

疏此九灋以下皆言邦國則施於諸侯為主但九

灋據殷同之時建之故大行人云殷同以施天下之政註云謂邦國之九灋

制畿封國以正邦國

疏制諸侯五百四百里之等各有封疆界分乃得

正

設儀辨位以等邦國

注儀謂諸侯及諸臣之儀辨別也別尊卑之位

進賢興功以作邦國

注興猶舉也作起也

疏進賢諸臣舊在位有德行者在草萊有德行未
遇爵命者進之使稱才任用興舉也臣有功者舉
之亦使任用

建牧立監以維邦國

注牧州牧也監監一國謂君也維猶連結也

制軍詰禁以糾邦國

疏案上文大國三軍次國二軍小國一軍詰禁者

士師有五禁天子禮此諸侯國亦當有五禁以相窮治相糾正

施貢分職以任邦國

注任猶事也事以其力之所堪

疏施貢多少大國貢半次國三之一小國四之一皆由天子施之此太宰九貢并小行人春令八貢皆是歲之常貢與大行人因朝而貢者異分職者即太宰所云九職是也彼據畿內此據諸侯邦國

亦由天子分之使民有職業

簡稽鄉民以用邦國

注簡謂比數之稽猶計也

均守平則以安邦國

注諸侯有土地者均之尊者守大卑者守小則法也

疏平則者謂五等職貢之等皆有常法訓守謂封

疆城池之固則謂關石和鈞之法如合方氏同其

數器壹其度量均守如掌疆司險之官所掌

此小事大以和邦國

注此猶親使大國親小國小國事大國相合和也易
此象曰先王以建萬國親諸侯訓九法以平邦國所
以制其不平而使之平也制畿封國以下四者是開
國承家之事制軍誥禁以下三者是師田政役之事
由大以及小自上以及下也均守平則如註疏說即
與制畿封國施貢分職二意相重蓋均守平則者均
其城郭溝池之守平其謹權審量讀法平價之則也

均守平則所以脩其內治比小事大所以睦其四鄰
此二者又綢繆未雨之計而內患外憂所以胥遠之
道也建牧立監宜次於制畿封國之下而乃先之以
設儀辨位進賢興功者蓋設儀辨位固兼牧監在其
中謂七命賜國八命作牧之類是也進賢興功亦包
牧監在其中如侯伯有功德者賜之附庸立為牧伯
之類是也故先之以設儀辨位進賢興功而後及建
牧立監也

以九伐之灋正邦國

疏此九伐施於邦國在於時會之時是以大行人
云時會以發四方之禁注云禁謂九伐之灋
馮弱犯寡則皆之

注皆猶人皆瘦也王霸記曰四面削其地

疏云四面削其地者對下文削之者示四面削之
為異也

賊賢害民則伐之暴內陵外則壇之

壇依註作
音善

注內謂其國外謂諸侯壇讀如同壇之壇王霸記曰
置之空壇之地玄謂置之空壇以出其君更立其次
賢者

疏蔡內即賊賢害民是也陵外即馮弱犯寡是也
上文各有其一故伐之胥之不奪其位此則內外
之惡兼有故壇之奪其位立其次賢鄭知立其次
賢者以其古者不滅國

野荒民散則削之

注削其地明其不能有

負固不服則侵之

注固險可依以固者也不服不事大也侵之者兵加其竟而已詩曰密人不共敢距大邦

疏云不服不事大上文比小事大是其服者也

賊殺其親則正之

注正之者執而治其罪王霸記曰正殺之也春秋僖二十八年冬晉人執衛侯歸之于京師坐殺其弟叔

武

殺戕其君則殘之

疏云殘者是加虐殺之

犯令陵政則杜之

注令猶命也王霸記曰犯令者違命也陵政者輕政法不循也杜之者杜塞使不得與鄰國交通

外內亂鳥獸行則滅之

疏外亂謂若齊襄公淫于外魯桓夫人文姜之等

是也內亂謂家內若衛宣公上烝父妾下納子妻
之等是也按春秋公羊左氏說凡征伐有六等謂
侵戰伐圍入滅用兵麤萌不聲鍾鼓入境而已謂
之侵侵而不服則戰之謂兩陣交刃戰而不服則
伐之謂用兵精而聲鍾鼓伐而不服則圍之謂市
其四郭圍而不服則入之謂入其四郭取人民不
有其地入而不服則滅之謂取其君訓犯令陵政
罪甚大不應但杜絕使不與鄰國交通而已杜之

為義恐與滅等如杜塞之杜謂圍困而取之也九法之所不能平者則九伐以正之九伐之序先輕而後重殘賊叛亂之事惡極釁厚皆起于王事之衰聖人之所難言也

正月之吉始和布政于邦國都鄙乃縣政象之灋于象魏使萬民觀政象挾日而斂之乃以九畿之籍施邦國之政職方千里曰國畿其外方五百里曰侯畿又其外方五百里曰甸畿又其外方五百里曰男畿又其外方

五百里曰采畿又其外方五百里曰衛畿又其外方五百里曰蠻畿又其外方五百里曰夷畿又其外方五百里曰鎮畿又其外方五百里曰蕃畿

縣音

注畿猶限也自王城以外五千里為界有分限者九籍其禮差之書也政職所供王政之職謂賦稅也

疏自蠻至鎮此三服總號蕃服故大行人云九州之外謂之蕃國指此三服也注云籍其禮差之書者諸侯賦貢多少有常則大國貢半次國三之一

小國四之一是其禮差也云政職所供王政之職
謂賦稅者按冢宰云以九職任萬民使萬民勤職
而出賦稅諸侯得之以半與三之一四之一市取
土毛以貢之則禹貢篚貢是也據民而出謂之賦
稅據諸侯所送謂之貢也

凡令賦以地與民制之上地食者參之二其民可用者
家三人中地食者半其民可用者二家五人下地食者
參之一其民可用者家二人

注賦給軍用者也令邦國之賦亦以地之美惡民之衆寡為制如六遂矣鄭司農云上地食者三之二假令一家有三頃歲種二頃休其一頃下地食者參之一田薄惡者所休多

疏此文承上邦國之下而云令賦是還據邦國諸侯而說也按遂人上地夫一厘田百畝萊五十畝中地家二百畝下地家三百畝與此上地食者三之二合故鄭云邦國如六遂矣訓九法九伐天子

之所以令諸侯九畿之籍與令賦之法諸侯之所
以承天子

中春教振旅司馬以旗致民平列陳如戰之陳

中音仲
下故此

陳直觀及下之陳可陳陳前徇
陳行陳巡陳皆同餘以意求之

注以旗者立旗期民于其下也凡師出曰治兵人曰
振旅皆習戰也四時各教民以其一焉春習振旅兵
人收衆專於農平猶正也

疏凡欲行蒐狩先焚草萊教戰訖乃入防田獵鄭

云治兵振旅皆習戰者按莊公八年師次于郎甲
午祠兵公羊傳曰出曰祠兵注云禮兵不徒使故
將出兵必祠於近郊陳兵習戰殺牲饗士卒八曰
振旅其禮一也左氏說治兵於廟禮也注云三年
而治兵與秋同名穀梁傳云出曰治兵習戰也入
曰振旅習戰也鄭於異義駁不從公羊云祠兵者
公羊字之誤亦不從左氏說治兵為授兵於廟云
於周司馬職曰仲夏教茆舍仲秋教治兵其下皆

云如戰之陳仲冬教大閱修戰法虞人萊所田之
野乃為之如是治兵之屬皆習戰非授兵於廟又
無祠五兵之禮是以爾雅云出為治兵尚威武也
人為振旅反尊卑也出則壯者在前老弱在後入
則壯者在後老弱在前

辨鼓鐸鐃鏡之用王執路鼓諸侯執賁鼓軍將執晉鼓
師帥執提旅帥執鼙卒長執鏡兩司馬執鐸公司馬執
鐃

鐸直各反鐸直角反鐸女交反
賁扶云反提徒兮反聾薄兮反

注鼓人職曰以路鼓鼓鬼享以賁鼓鼓軍事以晉鼓
鼓金奏以金鏡止鼓以金鐸通鼓以金鐃節鼓鄭司
農云提謂馬上鼓有曲木提持鼓立馬髦上者故謂
之提杜子春云公司馬謂五人為伍伍之司馬也玄
謂王不執賁鼓尚之於諸侯也伍長謂之公司馬者
雖卑同其號

疏春辨鼓鐸者鼓雷之類象中春雷發聲於外鄭

引鼓人職者欲見鼓人有六鼓四金據本各依所用今此所用或有不依本者以其惟賁鼓鼓軍事是依本王執路鼓軍將執晉鼓等並不依本用而在軍兼用也云提謂馬上鼓者先鄭蓋據當時以況周其實周時皆乘車無輕騎法也云王不執賁鼓尚之於諸侯者按賁鼓鼓軍事計王在軍自為元帥自合執賁鼓今不執賁鼓者見諸侯因朝而來與王為賓客故讓之使執賁鼓也

以教坐作進退疾徐疏數之節

數音朔

注習戰法

疏案下大閱禮備軍法中軍以鼙令鼓已下有此坐作進退疾徐疏數之節彼大閱具言於此略說有此坐作之法於教戰處為之

遂以蒐田有司表貉誓民鼓遂圍禁火弊獻禽以祭社

蒐所留反貉莫
駕反弊婢世反

注春田為蒐有司大司徒也掌大田役治徒庶之政

令表貉立表而貉祭也誓民誓以犯田法之罰也誓
曰無干車無自後射立旌遂圍禁旌弊爭禽而不審
者罰以假馬禁者虞衡守禽之厲禁也既誓令鼓而
圍之遂蒐田火弊火止也春田主用火因焚萊除陳
草皆殺而火止獻猶致也屬也田止虞人植旌衆皆
獻其所獲禽焉詩云言私其縱獻獬于公春田主祭
社者土方施生也

疏案下大閱禮遂以蒐田以下云以旌為左右和

之門羣吏各帥其車徒以敘和出左右陳車徒有
司平之既陳乃設驅逆之車有司表貉于陳前此
亦當如彼但春非大備故略言之也云獻禽祭社
者此因田獵而祭非月令仲春春祭社也鄭云立
旌遂圍禁者旌即下大閱禮云旌居卒間者是也
云虞衡守禽之厲禁者按地官川衡小田獵之所
無厲禁之事言衡者川衡或有與山澤連者則亦
有厲禁之事

中夏教茆舍如振旅之陳羣吏撰車徒讀書契辨號名之用帥以門名縣鄙各以其名家以號名鄉以州名野以邑名百官各象其事以辨軍之夜事其他皆如振旅

茆蒲末反撰息轉反又什轉反註音算

注茆讀如萊沛之沛茆舍草止之也軍有草止之法撰讀曰算算車徒謂數擇之也讀書契以簿書校錄軍實之凡要號名者綴識所以相別也鄉遂之屬謂之名家之屬謂之號百官之屬謂之事在國以表朝

位在軍又象其制而為之被之以備死事帥謂軍將
及師帥旅帥至伍長也以門名者所被綴識如其在
門所樹者也凡此言以也象也皆謂其制同耳軍將
皆名卿古者軍將蓋為營治于國門魯有東門襄仲
宋有桐門右師皆上卿為軍將者也縣鄙謂縣正鄙
師至鄰長也家謂食采地者之臣也鄉以州名亦謂
州長至此長也野謂公邑大夫百官以其職從王者
此六者皆書其官與名氏焉門則襄仲右師明矣鄉

則南鄉郵東鄉為人是也其他象此云某某之名某某之號某某之事而已未盡聞也鄉遂大夫文錯不見以其素信于民不為軍將或為諸帥是以闕焉夜事戒夜守之事草止者慎於夜於是主別其部職

疏云羣吏撰車徒者羣吏謂軍將至伍長各有部分注云號名徽識所以相別者即旌旗之細者也皆綴之於膊上以別死者云家之屬謂之號者謂都家之內從大夫至士云百官之屬謂之事者從

王朝六卿以下至下士野以邑名鄭雖不言亦在鄉遂之例以其同是溝洫之人出軍出貢又等也云家謂食采地者之臣者食采地是公卿大夫其身在朝其臣在采地若公山弗擾之類今隨主在軍故以其號為名也鄉以州名亦謂州長至此長今略舉州為首也云野謂公邑大夫者謂四等公邑其長二百里三百里如州長四百里五百里如縣正長下皆有屬官在軍者皆以邑為名云六者

皆書其官與名氏焉者假令為官則云大司徒下
某官姓名某也云鄉遂大夫文錯不見者此經六
遂直云縣鄙不言遂六鄉言以州名雖見鄉亦不
見鄉大夫之身云以其素信於民不為軍將或為
諸帥是以闕焉者鄉遂大夫以下至比長鄰長皆
因為軍吏以領本民在上或別使人為軍將則鄉
遂大夫別領人為師帥旅帥以下經在軍吏帥以
門名之內必知有別使人為軍將法者見外傳穆

叔云天子作師公帥之詩曰周公東征此並上公
為軍將詩曰韎韐有奭以作六師此乃諸侯世子
為軍將田獵亦容如此於是時鄉遂大夫則為諸
帥也若然下文云師都載殪鄉遂載物注云鄉遂
大夫或載殪或載物衆屬軍吏無所將者謂諸帥
亦不為衆屬他軍吏已身全無所將故不載旗義
與此合也

遂以苗田如蒐之灋車弊獻禽以享酌

酌餘
若反

注夏田為苗擇取不孕任者若治苗去不秀實者云
車弊者驅獸之車止也夏田主用車示所取物希皆
殺而車止王制曰天子殺則下大綏諸侯殺則下小
綏大夫殺則止佐車佐車止則百姓田獵祔宗廟之
夏祭也冬夏田主于祭宗廟者陰陽始起象神之在
內

疏此祭因田獵獻禽為祭若正祭自在孟月

中秋教治兵如振旅之陳

疏凡兵出曰治兵秋以出兵為名秋嚴尚威故也
辨旗物之用王載大常諸侯載旂軍吏載旗師都載旛
鄉遂載物郊野載旐百官載旛各書其事與其號焉其
他皆如振旅

注軍吏諸軍帥也師都遂大夫也鄉遂鄉大夫也或
載旛或載物衆屬軍吏無所將也郊謂鄉遂之州長
縣正以下也野謂公邑大夫載旐者以其將羨卒也
百官卿大夫也載旛者以其屬衛王也凡旌旗有軍

旅者畫異物無者帛而已

疏云軍吏諸軍帥者亦謂從軍將至下伍長皆是
軍吏也云師都遂大夫鄉遂鄉大夫者按司常云
孤卿建旌大夫士建物鄉大夫是卿建旌是其常
師都載旌不嫌無鄉大夫故鄭直舉遂大夫也云
鄉遂鄉大夫者以其遂大夫是中大夫建物是其
常今鄉遂建物不嫌無遂大夫故鄭直舉鄉大夫
也云或載旌或載物衆屬軍吏無所將者鄉遂大

夫若為軍將則是軍吏亦載旗今不載旗故知非
直不為軍將亦不為諸帥以是載殳載物而已若
然既不為軍吏遂大夫上得與卿同載殳鄉大夫
是卿下得與大夫同載物也以鄉遂大夫掌衆同
故同載物也云郊謂鄉遂之州長縣正以下者郊
內有六鄉州長已下郊外有六遂縣正已下有此
二等云野謂公邑大夫者按載師職云公邑之田
任甸地甸則郊外曰野故以野言之但公邑自甸

以出至疆有四等皆以大夫治之云載旐以其將
羨卒者正卒既屬軍吏其餘羨卒使此州長已下
不為軍吏者領之但公邑之內雖不見有出軍之
法若出軍亦當與鄉遂同若出軍亦正卒使大夫
等為軍吏其羨卒亦使不為軍吏者領之云載旐
以其屬衛王者以六官之卿大夫其屬各六十有
選當行衛守王者即是有衆故載鳥隼之旐也

遂以獮田如蒐田之灋羅弊致禽以祀祫

獮息淺反
祫注音方

注秋田為獮獮殺也羅弊罔止也秋田主用罔中殺者多也祊當為方秋田主祭四方報成萬物詩曰以社以方

疏云祀祊者羅止田畢入國過郊之神位乃致禽以祀四方之神

中冬教大閱

注春辨鼓鐸夏辨號名秋辨旗物至冬大閱簡軍實凡頒旗物以出軍之旗則如秋以尊卑之常則如冬

司常佐司馬時也大閱備軍禮而旌旗不如出軍之時空辟實

疏云春辨鼓鐸已下欲見春夏秋各教其一至冬大閱之時總教之云凡頒旗物以出軍之旗則如秋以尊卑之常則如冬司常佐司馬時者按司常云孤卿建旌大夫士建物師都建旗州里建旗縣鄙建旒道車載旒游車載旌此為異也云大閱備軍禮而旌旗不如出軍之時空辟實者大閱雖備

禮是教戰非實出軍法是其空也秋教治兵是出
軍法故寄出軍之旗於彼是冬之空辟實也趙商
問巾車職建大麾以田註田四時田獵按大司馬
職四時皆建太常何鄭云麾夏之正色春夏尚生
其時宜入兵夏本不以兵得天下故建其正色以
春夏田至秋冬出兵之時乃建太常商又問巾車
職建大白以即戎注云謂兵車司馬職仲秋王建
太常注凡頒旗物以出軍之旗則如秋不知大白

以即戎為何時答曰白者殷之正色王即戎者或
命將或勞師不自親將故建先王之正色異於親
自將也

前期羣吏戒衆庶修戰灋

注羣吏鄉師以下

疏言鄉師以下則可及州長不及鄉大夫鄉大夫
則鄉也知羣吏鄉師以下者見鄉師職凡四時之
田前期出田法于州里簡其鼓鐸旗物兵器脩其

卒伍是其事也州長黨正族師職中亦皆有作民
師田行役之事

虞人萊所田之野為表百步則一為三表又五十步為
一表田之日司馬建旗于後表之中羣吏以旗物鼓鐸
鐸鏡各帥其民而致質明弊旗誅後至者乃陳車徒如
戰之陳皆坐

注鄭司農云虞人萊所田之野芟除其草萊令車得
驅馳詩曰田卒汙萊玄謂萊芟除可陳之處後表之

中五十步表之中央表所以識正行列也四表積二百五十步左右之廣當容三軍步數未聞致致之司馬質正也弊仆也皆坐當聽誓

疏虞人者若田在澤澤虞若田在山山虞後鄭不從先鄭解虞人萊所田之野者按王制云昆蟲未蟄不以火田則仲冬之時放火田獵何須芟除草萊是以車攻詩毛傳云大艾草以為防然後焚而射焉是田處不得芟草萊故後鄭易之以為芟除

可陳之處

羣吏聽誓于陳前斬牲以左右徇陳曰不用命者斬之
注羣吏諸軍帥也陳前南面鄉表也月令季秋天子
教於田獵以習五戎司徒摯朴北面誓之此大閱禮
實正歲之仲冬而況季秋之政於周為中冬為月令
者失之矣斬牲者小子也凡誓之大略甘誓湯誓是
也

疏云此大閱禮實正歲之中冬者周雖建子為正

及其行事皆用夏之正歲也

中軍以鼙令鼓鼓人皆三鼓司馬振鐸羣吏作旗車徒皆作鼓行鳴鐃車徒皆行及表乃止三鼓攬鐸羣吏弊旗車徒皆坐

攬音鹿

注中軍中軍之將也天子六軍三三而居一偏羣吏既聽警各復其部曲鼓人者中軍之將師帥旅帥也司馬兩司馬也振鐸以作衆作起也既起鼓人擊鼓以行之伍長鳴鐸以節之及表自後表前至第二表

也三鼓者鼓人也掩上振之為擺擺者止行息氣也
疏此即中春振旅疾徐坐作之事是也云中軍中
軍之將者此六軍三軍居一偏皆自有中軍也云
羣吏既聽誓各復其部曲者誓之時出向衆前聽
誓訖各復其部伍本處也云鼓人中軍之將師帥
旅帥者按上云軍將執晉鼓師帥執提旅帥執鼙
皆是鼓人也

又三鼓振鐸作旗車徒皆作鼓進鳴鐃車驟徒趨及表

乃止坐作如初

驟仕
救反

注趨者赴敵尚疾之漸也及表自第二前至第三

乃鼓車馳徒走及表乃止

注及表自第三前至前表

鼓戒三闕車三發徒三刺

闕音
缺

注鼓戒戒攻敵鼓一闕車一轉徒一刺三而止象服

敵

乃鼓退鳴鐃且卻及表乃止坐作如初

注饒所以止鼓軍退卒長鳴饒以和衆鼓人為止之也退自前表至後表鼓鐸則同習戰之禮出入一也異者廢鐸而鳴饒

遂以狩田以旌為左右和之門羣吏各帥其車徒以敘和出左右陳車徒有司平之旗居卒間以分地前後有屯百步有司巡其前後險野人為主易野車為主

易以鼓反

注冬田為狩言守取之無所擇也軍門曰和立兩旌以為之敘和出用次第出和門也左右或出而左或

出而右有司平之鄉師居門正其出入之行列也旗
軍吏所載分地調其部曲疏數前後有屯百步車徒
異羣相去之數也車徒畢出和門鄉師人巡其行陳
司農云險野人為主人居前易野車為主車居前

疏云以旌為左右和之門者六軍分三軍各處東
西為左右各為一門云以敘和出者以教戰處內
故以田處出鄭知有司是鄉師者見鄉師職云巡
其前後之屯云車徒異羣者出軍之時車徒同羣

今在軍行列之時則車徒異羣也

既陳乃設驅逆之車有司表貉于陳前

注驅驅出禽獸使趨田者也逆逆要不得令走設此車者田僕也

中軍以鼙令鼓鼓人皆三鼓羣司馬振鐸車徒皆作遂鼓行徒銜枚而進大獸公之小禽私之獲者取左耳

注羣司馬謂兩司馬也枚如箸銜之有繮結項中軍法止語為相疑惑也獲得也得禽獸者取左耳當以

計功

疏此與上文教戰時大同惟徒銜枚為異

及所弊鼓皆賊車徒皆譟

賊本亦作駭胡楷反李一音夾譟音巢素報反

注及所弊謂至所弊之處田所當於止也天子諸侯
蒐狩有常至其常處吏士鼓譟象攻敵剋勝而喜也
疾雷擊鼓曰賊

徒乃弊致禽饁獸于郊入獻禽以享烝

饁于軌反劉于法反

注徒乃弊徒止也冬田主用衆致禽饁獸于郊聚所

獲禽因以祭四方神於郊月令季秋天子既田命主
祠祭禽于四方是也入又以禽祭宗廟

及師大合軍以行禁令以救無辜伐有罪

注師所謂王巡守若會同司馬起師合軍以從所以
威天下行其政也不言大者未有敵不尚武

疏云師謂王巡守若會同者對下文大師是出軍
法故鄭云未有敵不尚武也

若大師則掌其戒令蒞大卜帥執事蒞釁主及軍器

注大師王出征伐也臨大卜卜出兵吉凶也主謂遷廟之主及社主在軍者也軍器鼓鐸之屬凡師既受甲迎主于廟及社主祝奉以從殺牲以血塗主及軍器皆神之

疏案小子職云釁邦器及軍器彼官釁之大司馬涖之

及致建大常比軍將誅後至者

注致鄉師致民于司馬比校次之也

疏鄭知鄉師致民于司馬者據鄉師職知之司馬
用王大常者以上文大師王親御六軍故司馬用
王之大常致衆若王不親則司馬自用大旗致之
及戰巡陳眡事而賞罰

注事謂戰功也

若師有功則左執律右秉鉞以先愷樂獻于社

越鉞音

注律所以聽軍聲鉞所以為將威也先猶道也兵樂
曰愷

疏趙商問夏官師有功則獻于社春官大司樂王
師大獻則令奏愷樂注云大獻獻捷於祖不達異
意鄭云司馬主軍事之功故獻於社大司樂宗伯
之屬宗伯主宗廟故獻於祖若然軍有功二處俱
獻以出軍之時告于祖宜于社故反必告也

若師不功則厭而奉主車

厭於涉反
李於入反

注厭伏冠也奉猶送也送主歸于廟與社

疏厭謂伏冠者按曲禮厭冠不入公門彼差次當

總小功之冠以義言之五服之冠皆厭以其喪冠
反吉冠於武上向內縫之喪冠於武下向上縫之
以伏冠在武故得厭伏之名

王弔勞士庶子則相

勞力報反

注師敗王親弔士庶子之死者勞其傷者則相王之
禮庶子卿大夫之子從軍者或謂之庶士

疏云庶子為卿大夫之子適庶俱兼則經中士為
卿大夫士之身案宮伯掌士庶子注云士適子庶

子其支庶與此異者彼宮正掌卿大夫士宮伯別
掌士庶子此惟一文故不同也此注不云士之子
者以其卿大夫之適子為王及后與士同士之子
如衆人不得為王及后如士故不弔勞之也

大役與慮事屬其植受其要以待攷而賞誅

與音預傷
音灼植直

反吏

注大役築城邑也鄭司農云國有大役大司馬與謀
慮其事也玄謂慮事者封人也於有役司馬慮之植

築城植也屬賦丈尺與其人數

疏植者版榦之屬

榦音貞

大會同則帥士庶子而掌其政令

注帥師以從王

若大射則合諸侯之六耦

注王將祭射于射宮以選賢也王射三侯以諸侯為六耦

疏王大射之時有諸侯來朝在京師者大司馬令

之為六耦此大射是將祭而射故用諸侯為六耦
若賓射射人亦用六耦但不用諸侯當用卿大夫
為之燕射三耦自然用卿大夫以下為之

大祭祀饗食羞牲魚授其祭

注牲魚魚牲也祭謂尸賓所以祭也鄭司農云大司
馬主進魚牲

疏大祭祀謂天地宗廟此大祭據宗廟而言其中
小之祭祀亦為之矣饗食行之在廟故與大祭祀

同鄭云祭謂尸賓所以祭也者大祭祀授尸祭饗
食授賓祭若王祭則膳夫云授王祭是也

大喪平士大夫

注鄭司農云平一其服也玄謂平者正其職與位

疏必使司馬平之者司馬之屬有司士主羣吏今
王喪不得使司士故司馬平之先鄭云平一其服
按小宗伯已懸衰冠故後鄭不從也

喪祭奉詔馬牲

注王喪之以馬祭者蓋遣奠也奉猶送也送之至墓告而藏之

疏知喪祭是大遣奠者以其喪奠反虞卒哭喪祭之等無奉送詔告惟有大遣奠入壙之時有奉送之事

小司馬之職掌

注此下字脫滅札爛文闕漢興求之不得遂無識其數者

凡小祭祀會同饗射師田喪紀掌其事如大司馬之灋
疏小會同謂諸侯使卿大夫來聘王使卿大夫與
之會同言饗射師田皆是諸侯卿大夫來聘王還
使卿大夫與饗燕及射師田之等也小喪紀者三
夫人以下

軍司馬

闕

輿司馬

闕

行司馬

闕

司勲掌六鄉賞地之灋以等其功

注賞地賞田也在遠郊之內屬六鄉焉等猶差也以功大小為差

疏云賞田在遠郊之內者見載師云賞田任遠郊之地

王功曰勲

注輔成王業若周公

國功曰功

注保全國家若伊尹

民功曰庸

注法施於民若后稷

事功曰勞

注以勞定國若禹

治功曰力

注制法成治若咎繇

戰功曰多

注尅敵出奇若韓信陳平司馬法曰上多前虜訓按國功若申勃蕪之存楚國以之為存亡者也民功若公叔文子為粥與國之餓者是有遺愛在民而民思之者也事若禮樂兵農之類各有所長治若官府簿書之職欲其無怠此皆以大小為先後也

凡有功者銘書於王之大常祭於大烝司勲詔之

注銘之言名也生則書于王旌以識其人與其功也死則於烝先王祭之詔謂告其神以辭也今漢祭功

臣於廟廷

疏有功謂上六者詔之謂詔司常書之又以辭使
春官告神引漢法者欲見古者亦在廟廷也

大功司勲藏其貳

注功書藏於天府又副於此者以其主賞訓按上云
凡有功者此別云大功蓋王功國功也注謂功書藏
於天府今天府職文無之或即指銘書大常為正藏
於司勲者為副耶大功又藏其副重之也

掌賞地之政令

注政令謂役賦

凡賞無常輕重眡功凡頒賞地參之一食

注賞地之稅參分計稅王食其一二全入於臣

疏采地之稅四之一與小國入天子同賞田參之

一與次國入天子同

惟加田無國正

正音征

注加田既賞之又加賜以田所以厚恩也正謂稅也

祿田亦有給公家賦貢獨加賞之田無正耳

疏加田未知所在或當與賞田同在遠郊大夫士
賜地凡有四種大夫已有采地又有賞田加田
載師又有仕田即王制圭田是有四種王制云大
夫有田則祭無田則薦是知士亦有田法也

馬質掌質馬馬量三物一曰戎馬二曰田馬三曰駕馬

皆有物賈

賈音嫁

注此三馬買以給官府之使無種也皆有物賈皆有

物色及賈直

疏質平也主平馬力及毛色與賈直訓此三者之馬以共國用若王所用則當有種馬齊馬道馬三物也戎馬田馬以共軍事田獵駕馬以共官府百事之用各有物賈謂如下文有用官馬而死須以物更也物馬材也注謂無種謂不如校人養馬法孳其生育但國家官府所用馬當亦有常數如校人所云而今不可考矣至其養之或亦牧人牧六

牲中容有馬與

綱惡馬

注綱謂以縻索維綱狎習之

凡受馬於有司者書其齒毛與其賈馬死則旬之內更旬之外入馬耳以其物更其外否

賈音嫁
更音庚

注更謂償也旬之內死者償以齒毛與賈受之日淺養之惡也旬之外死入馬耳償以毛色不以齒賈任之過其任也其外否者旬之外踰二十日而死不任

用非用者罪

疏所受之馬謂給公家之使旬內死者償以齒毛與賈以其日少雖過其任若養之善未能致死也旬外死入馬耳償以毛色不以齒賈者以其任過其任雖善養之可以致死云旬之外踰二十日死不任用非用者罪者以其行使二十日外馬力既竭雖齊其任養之善容得致死故不償訓此蓋以事之勞逸用之久近為等事逸則用近事勞則用

久用近而死是濫用也則償之用久而死是為官
事非得已也則不償旬之內不但償如其毛色兼
如其齒賈從重也旬之外償如其毛色耳齒賈雖
有老幼貴賤之不同不責也是從輕也二旬以外
則并不責之矣

馬及行則以任齊其行

注識其所載輕重及道里齊其勞逸乃復用之訓案
及行謂有事用之注云齊其勞逸乃復用之者謂所

有之馬更番用遍然後初用者乃可以次用之不可使有常用或常不用則勞逸不均也注識字讀如誌記之也輕重道里通釋任字


若有馬訟則聽之

注訟謂賣買之言相負

禁原蠶者

注原再也天文辰為馬蠶為龍精月直大火則浴其種是蠶與馬同氣物莫能兩大禁再蠶者謂傷馬與

疏天文辰為大火房為天駟故曰辰為馬月直大
火謂二月按內宰仲春始蠶謂浴其種祭義云大
昕之朝奉種浴于川注云大昕季春朔日又浴者
將生時又重浴之也



周禮纂訓卷十五